

Prečišćeni tekst Pravilnika o izgledu i sadržaju izjave o svojstvima građevinskog proizvoda obuhvata sljedeće propise:

1. Pravilnik o izgledu i sadržaju izjave o svojstvima građevinskog proizvoda ("Službeni list Crne Gore", br. 046/14 od 31.10.2014),
2. Pravilnik o dopuni Pravilnika o izgledu i sadržaju izjave o svojstvima građevinskog proizvoda ("Službeni list Crne Gore", br. 038/17 od 20.06.2017),
3. Pravilnik o izmjenama Pravilnika o izgledu i sadržaju izjave o svojstvima građevinskog proizvoda ("Službeni list Crne Gore", br. 114/23 od 19.12.2023), u kojima je naznačen njihov dan stupanja na snagu.

## **PRAVILNIK**

# **O IZGLEDU I SADRŽAJU IZJAVE O SVOJSTVIMA GRAĐEVINSKOG PROIZVODA**

**("Službeni list Crne Gore", br. 046/14 od 31.10.2014, 038/17 od 20.06.2017, 114/23 od 19.12.2023)**

### **Član 1**

Ovim pravilnikom propisuje se izgled i sadržaj izjave o svojstvima koju proizvođač sačinjava, kada se građevinski proizvod obuhvaćen crnogorskim standardom ili usklađen sa tehničkom ocjenom koja je za njega izdata, stavlja na tržište.

### **Član 2**

Kada je građevinski proizvod obuhvaćen crnogorskim standardom ili usklađen sa tehničkom ocjenom koja je za njega izdata, podaci o njegovim svojstvima u vezi sa bitnim karakteristikama, određeni u primjenjivoj tehničkoj specifikaciji, daju se samo ako su uključene i navedene u izjavi o svojstvima.

### **Član 3**

Izjava o svojstvima, pored podataka iz člana 12 Zakona o građevinskim proizvodima, sadrži referentni broj posebne tehničke dokumentacije koja se koristila i zahtjeve s kojima je proizvod usaglašen prema tvrdnji proizvođača.

### **Član 4**

Izjava o svojstvima data je na Obrascu "Izjava o svojstvima građevinskih proizvoda", koji je sastavni dio ovog pravilnika.

### **Član 4a**

Uputstvo za sačinjavanje Izjave o svojstvima građevinskog proizvoda, dato je na Obrascu 2, koji čini sastavni dio ovog pravilnika.

### **Član 5**

*Briše se. (Pravilnik o izmjenama Pravilnika o izgledu i sadržaju izjave o svojstvima građevinskog proizvoda, "Sl. list CG", br. 114/23)*

### **Član 6**

Privredni subjekti mogu objaviti izjavu o svojstvima na internet-stranicama, ako obezbijede:

- 1) da se sadržaj izjave o svojstvima ne mijenja nakon objavljivanja na internet-stranicama;
- 2) da se internet-stranice na kojima su objavljene izjave o svojstvima, sastavljene za građevinske proizvode prate i održavaju na način da internet-stranice i izjave o svojstvima primaocima građevinskih proizvoda budu stalno na raspolaganju;
- 3) da primaoci građevinskih proizvoda mogu pristupiti izjavi o svojstvima, bez naknade deset godina nakon stavljanja građevinskog proizvoda na tržište;
- 4) primaocima građevinskih proizvoda uputstva za pristup internet-stranicama i izjavama o svojstvima koje su sastavljene za te proizvode i dostupne na navedenim internet-stranicama.

### **Član 7**

Veza svakog pojedinačnog proizvoda ili serije istog proizvoda koji se stavlja na tržište sa određenom izjavom o svojstvima, obezbjeđuje se uz pomoć jedinstvene identifikacione oznake vrste proizvoda.

## Član 8

Ovaj pravilnik stupa na snagu osmog dana od dana objavljivanja u "Službenom listu Crne Gore".

**„OBRAZAC**

### IZJAVA O SVOJSTVIMA GRAĐEVINSKIH PROIZVODA

Br. ....

1. Jedinstveni identifikacioni broj vrste proizvoda: .....

2. Namjena/namjene: .....  
.....

3. Proizvođač: .....  
.....

4. Ovlašćeni zastupnik: .....

5. Sistem/sistemi za ocjenu i provjeru postojanosti svojstava (AVCP): .....

6.a Crnogorski standard.....  
.....

Imenovano tijelo za ocjenu i provjeru postojanosti svojstava/tijela:.....  
.....

6.b Dokument o ocjeni:.....  
.....

Tehnička ocjena: .....  
.....

Imenovano tijelo za tehničku ocjenu:.....

Imenovano tijelo za ocjenu i provjeru postojanosti svojstava/tijela: .....  
.....

7. Objavljena svojstva: .....  
.....

8. Odgovarajuća tehnička dokumentacija i/ili specifična tehnička dokumentacija: .....  
.....

Ranije utvrđeno svojstvo proizvoda u skladu je sa objavljenim svojstvima. Ova izjava o svojstvima izdaje se, u skladu sa zakonom koji se uređuju građevinski proizvodi, pod isključivom odgovornošću prethodno utvrđenog proizvođača.

Za proizvođača i u njegovo ime potpisao:

[Ime] .....

U [mjesto] ..... dana [datum izdavanja] .....

[potpis].....“

**UPUTSTVO ZA SAČINJAVANJE IZJAVE O SVOJSTVIMA GRAĐEVINSKOG  
PROIZVODA**

Prilikom sastavljanja izjave o svojstvima proizvođač:

- 1) reprodukuje tekstove i naslove Obrasca 2 koji nijesu navedeni u zgradama;
- 2) zamjenjuje praznine i zagrade unošenjem potrebnih informacija.

Proizvođač može u izjavi o svojstvima i da navede internet stranicu na kojoj je primjerak izjave o svojstvima stavljen na raspolaganje u skladu s članom 6 Pravilnika o izgledu i sadržaju izjave o svojstvima. Ta informacija se može uključiti nakon tačke 8 ili na drugom mjestu na način da ne utiče na čitljivost i jasnoću obaveznih podataka.

Ukoliko izjava o svojstvima sadrži podatke utvrđene članom 12 Zakona o građevinskim proizvodima (u daljem tekstu: Zakon), može se:

- 1) upotrijebiti drugačiji raspored od rasporeda datog u Obrascu 2;
- 2) kombinovati nekoliko tačaka Obrasca 2 u jednu tačku;
- 3) prikazati tačke Obrasca 2 različitim redoslijedom ili pomoću jedne ili više tablica;
- 4) izostaviti određene tačke Obrasca 2 koje nijesu važne za proizvod za koji se sastavlja izjava o svojstvima. Npr. budući da se izjava o svojstvima zasniva na crnogorskom standardu ili na tehničkoj ocjeni izdatoj za taj proizvod, isključuje se primjena jedne od alternativa i ona se iz Obrasca 2 izostavlja ili uklanja. To izostavljanje ili uklanjanje se može odnositi i na tačku o imenovanom predstavniku ili o upotrebi odgovarajuće tehničke dokumentacije i specifične tehničke dokumentacije;
- 5) prikazati tačke bez označavanja brojem. Ako proizvođač izdaje jedinstvenu izjavu o svojstvima koja obuhvata različite vrste proizvoda, potrebno je odvojeno i jasno navesti za svaku verziju/tip proizvoda sljedeće elemente:
  - broj izjave o svojstvima,
  - identifikacionu oznaku iz tačke 1. Obrasca 2, i
  - objavljena svojstva iz tačke 7 Obrasca 2.

**Obrazac se popunjava na sljedeći način:**

| Tačke obrasca                   | Uputstva                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                 |
|---------------------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Broj izjave o svojstvima</b> | <p>Navodi se referentni broj izjave o svojstvima predviđen članom 2 stav 3 tačka 5 Pravilnika o načinu označavanja građevinskog proizvoda ("Službeni list CG", br. 46/14 i 73/16).</p> <p>Odabir broja prepušten je proizvođaču.</p> <p>Taj broj može biti jednak jedinstvenoj identifikacionoj oznaci vrste proizvoda iz tačke 1 Obrasca.</p>                                                                                                                                                                                                                                                                                                                                                                                                                                                                                                                                                                                                           |
| <b>Tačka 1</b>                  | <p>Navodi se jedinstveni identifikacioni broj vrste proizvoda iz člana 12 stav 2 tačka 1 Zakona.</p> <p>U skladu sa članom 2 stav 3 Pravilnika o načinu označavanja građevinskog proizvoda, jedinstveni identifikacioni broj koji je odredio proizvođač i koja prati oznaku građevinskog proizvoda, povezan je s vrstom proizvoda, a na taj način i s nivoima ili razredima svojstava građevinskog proizvoda, kako se navodi u izjavi o svojstvima sastavljenoj za taj proizvod.</p> <p>Primaocima građevinskih proizvoda, odnosno krajnjim korisnicima, neophodno je omogućiti nedvosmisleno utvrđivanje tih nivoa ili razreda svojstava za bilo koji proizvod. Stoga proizvođač svaki građevinski proizvod za koji je sastavljena izjava o svojstvima povezuje sa jedinstvenim identifikacionim brojem s odgovarajućom vrstom proizvoda i određenim nivoima ili razredima svojstava, a ta je oznaka i referenca iz člana 12 stav 2 tačka 1 Zakona.</p> |
| <b>Tačka 2</b>                  | <p>Navodi se namjena ili po potrebi, namjene građevinskog proizvoda kako je predvidio proizvođač, u skladu s primjenjivim tehničkim specifikacijama.</p>                                                                                                                                                                                                                                                                                                                                                                                                                                                                                                                                                                                                                                                                                                                                                                                                 |
| <b>Tačka 3</b>                  | <p>Navodi se ime, odnosno naziv i adresa proizvođača iz člana 17 stav 1 tačka 8 Zakona.</p>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                              |
| <b>Tačka 4</b>                  | <p>Ova tačka se uključuje i popunjava samo ako je određen ovlašćeni zastupnik. U tom slučaju, navodi se ime/naziv i adresa za kontakt ovlašćenog zastupnika čije ovlašćenje obuhvata obaveze iz člana 18 stav 1 tač. 1 i 2 Zakona.</p>                                                                                                                                                                                                                                                                                                                                                                                                                                                                                                                                                                                                                                                                                                                   |
| <b>Tačka 5</b>                  | <p>Navodi se broj primjenjivog sistema ili sistema ocjene i provjere postojanosti svojstava građevinskog proizvoda, kako je utvrđeno u Pravilniku o sadržaju sistema ocjene građevinskog proizvoda ("Službeni list CG", broj 46/14).</p> <p>Ako se primjenjuje više sistema, navodi se svaki od njih.</p>                                                                                                                                                                                                                                                                                                                                                                                                                                                                                                                                                                                                                                                |
| <b>Tačka 6.a i 6.b</b>          | <p>Kako se izjava o svojstvima sastavlja na osnovu crnogorskog standarda ili tehničke ocjene izdate za taj proizvod, ti podaci prikazuju se u tačkama 6.a i 6.b alternativno, pa se u izjavi o svojstvima navodi samo jedna od njih.</p> <p>Ako se primjenjuje tačka 6.a, tj. ako se izjava o svojstvima zasniva na crnogorskom standardu, navodi se sljedeće:</p> <ul style="list-style-type: none"> <li>a) referentni broj crnogorskog standarda i datum njenog izdavanja (datirani uput) i</li> <li>b) identifikacioni broj imenovanog tijela, odnosno imenovanih tijela za ocjenu i provjeru.</li> </ul> <p>Pri navođenju naziva imenovanog tijela, odnosno imenovanih tijela</p>                                                                                                                                                                                                                                                                    |

za ocjenu i provjeru, važno je naziv navesti na izvornom jeziku, bez prevođenja na crnogorski jezik.

Ako se primjenjuje tačka 6.b, tj. ako se izjava o svojstvima zasniva na-tehničkoj ocjeni izdatoj za taj proizvod, navodi se sljedeće:

- a) broj dokumenta o ocjeni i datum njegovog izdavanja;
- b) broj tehničke ocjene i datum njenog izdavanja;
- c) naziv imenovanog tijela za tehničku ocjenu; i
- d) identifikacijski broj imenovanog tijela, odnosno imenovanih tijela za ocjenu i provjeru.

**Tačka 7**

Pod ovom tačkom u izjavi o svojstvima navodi se:

- a) popis bitnih karakteristika, kako je utvrđeno u tehničkim specifikacijama za namjenu ili namjene iz tačke 2 ovog obrasca, i
- b) za svaku bitnu karakteristiku, objavljeno svojstvo iskazano nivoom, razredom ili opisno, u odnosu na tu karakteristiku, odnosno za karakteristiku za koju svojstva nisu objavljena, oznaka "NPD" – bez utvrđenog svojstva (engl. *No Performance Determined*). Ta se tačka može ispuniti uz pomoć tabele u kojoj se pokazuje povezanost tehničkih specifikacija sa sistemima ocjene i provjere svojstava posebno za svaku važnu karakteristiku proizvoda, kao i za svojstvo u odnosu na svaku važnu karakteristiku.

Svojstvo se objavljuje jasno i izričito. Zbog toga se svojstvo u izjavi o svojstvima ne može opisati samo navođenjem formule proračuna koju primjenjuju primaoci.

Nivoi ili razredi svojstava iskazani u referentnim dokumentima reprodukuju se u samoj izjavi o svojstvima i ne mogu izraziti samo upućivanjem na te dokumente u izjavi o svojstvima.

Izuzetak od navedenog, svojstva strukturnog ponašanja građevinskog proizvoda, mogu se izraziti upućivanjem na odgovarajuću proizvodnu dokumentaciju ili proračun konstrukcije. U tom slučaju odgovarajuća dokumentacija se prilaže uz izjavu o svojstvima.

**Tačka 8**

Ova se tačka uključuje u izjavu o svojstvima i ispunjava samo ako se upotrebljava odgovarajuća tehnička dokumentacija i/ili specifična tehnička dokumentacija, u skladu sa čl. 41, 42 i 43 Zakona, radi navođenja zahtjeva sa kojima je proizvod usaglašen.

U tom slučaju, pod ovom tačkom navodi se sljedeće:

- a) referentni broj specifične ili odgovarajuće tehničke dokumentacije; i
- b) zahtjevi sa kojima se proizvod usaglašava.

**Potpis  
proizvođača**